

La SRG.R surdat il premi 2013 a Rina Steier-Peduzzi ed a Rest Martin Cabalzar

■ (cp) **La suprastanza da la SRG SSR Svizra Rumantscha ha decidì da surdar ses premi il 2013 a Rina Steier-Peduzzi ed a Rest Martin Cabalzar.** La societad purtadra da RTR Radiotelevision Svizra Rumantscha distingua ils undrads cun il premi primarmain per lur engaschi a favur da la lingua e cultura rumantscha. La suprastanza da la SRG.R, timunada dapi il schaner 2013 dad *Oscar Knapp* da Scuol, surdat 2013 il premi a *Rina Steier-Peduzzi* da Savognin per ses engaschi solid ed endinà en differentas domenas da la vita publica insumma, per la promoziun da las dunnas, per la cultura ed il linguatg en spezial. Quest engaschi da Rina Steier-

Peduzzi è caracterisà d'ina ferma voluntad persunala per megliar situaziuns politicas e socialas e per dar in avegnir a linguatg e cultura.

Rest Martin Cabalzar da Cumbel retschaiva il premi per sia remartgablavur schurnalistica e publicistica sur quatter decennis per la pressa rumantscha insumma, per la «Gasetta Romantscha» e *La Quotidiana* en particular. Questa lavur è caracterisada entras cuntinuitad, fidadad ed entras in'auta etica professiunala per qualitat materiala, furmala e linguistica. Qua tras ha Rest Martin Cabalzar contribuì essenzialmain a l'existenza ed al svilup da la pressa

rumantscha e promovì linguatg, cultura e schientscha rumantscha.

Onn per onn surdat la societad purtadra SRG SSR Svizra Rumantscha in premi dotà cun total 8000 francs. Quest premi va a persunalitads u ad instituziuns ed organisaziuns ch'èn sa distinguidas a moda particulara sin in champ spezial. La SRG.R ha grond plaschair d'astgar render uschia stima a Rina Steier-Peduzzi ed a Rest Martin Cabalzar che collavuran dal rest omadus dapi onns per ils programs da RTR. Il premi vegn surdà a chaschun da la radunanza generala da la SRG.R ils 25 da martg a Salouf.



Rina Steier-Peduzzi e Rest Martin Cabalzar vegnan undrads cun il premi da SRG.R per lur engaschi a favur da la lingua e cultura rumantscha.